



Пётрой бэшэнэн хоёрдохи хандалга

Амаршалга

1 ¹ Манай Бурхан ба Абарагша болохо Иисус Христосой үршөөһэн үнэн сэдхэлэй ашаар маанадтал адли этигэл хүзэгтэй болоһон хүнүүд, таанадта Иисус Христосой зараса болон элшэн Симон Пётр бэшэнэ.

² Манай Бурхан ба Дээдын Эзэн Иисусые мэдэрһэнэйтнай ашаар Бурханай үршөөл хайра, амгалан тайбан та бүхэнтэй элбэг дэлбэг байхань болтогой!

Бурханай хүнүүдые дуудан, шэлэжэ абанан тухай

³ Бурханай эрхэ мэдэлээр ажамидаржа байхымнай тула тэрэниие мэдэрһэнэймнай ашаар Иисусаа эхитэй Бурханай хүсэн бүхы хэрэгтэй юумые маанадта үгөө. Бурхан алдараараа болон буян хэшэгээрээ хубалсахын тула бидэниие дуудаа, ⁴ тэдэнэйнгээ ашаар бидэндэ агуухэ, ехэ үнэтэй найдуулга үгөө. Энэ дэлхэйн хүсэлэнгүүдтэй холбоотой үхэлые дабажа, Бурханай ажамидаралаар ажаһуухынтнай тула энэ найдуулга үгтөө юм. ⁵⁻⁷ Тиимэһээл таанад хайн хайхан хэрэгүүдээрээ хүзэг этигэлээ бэхижүүлхые бүхы хүсэ шадалаараа оролдогты, хайн хайхан хэрэгүүдһээ гадна эрдэм ухаантай байхые, эрдэм ухаантай байхаһаа гадна бөө бариха аргатай, бөө барихаһаа гадна тэсэбэритэй байхые, тэсэбэритэй байхаһаа гадна Бурханда өөрыгөө зорюулан ажамидархые, Бурханда өөрыгөө зорюулан ажамидархаһаа гадна аха дүүнэрэй найрамдалтай, аха дүүнэрэй найрамдалһаа гадна хайра дуратай байхые бүхы хүсэ шадалаараа оролдожо байгты. ⁸ Иимэ хайн хайхан шанарнуудаа бэхижүүлжэ байбалтнай, манай Дээдын Эзэн Иисус Христосые мэдэрхэдэ тэдэтнай таанамые үрэ дүнгүй, аша туһагүй байлгахагүйл. ⁹ Харин иимэ шанарнуудгүй хүнүүд холо харадаггүй хохорнууд юм: урданайгаа нүгэлнүүдһээ

аршалагдаханаа мартажархидаг юм. ¹⁰Тиимэхээл, аха дүүнэр, Бурханда дуудуулханаа, шэлэгдэжэ абтаһанаа баталхые хайса оролдогты. Тиигэжэ байбал таанад зүб замһаа хадуурхагүйт. ¹¹Тиигэбэлтнай манай Дээдын Эзэн, Абарагша Иисус Христосой мүнхын хаан орондо орохо бүрин эрхэ таанадта үгтэхэл.

¹²Эдэ бүгэдые мэдээд, таанадта үгтэһэн үнэн зүбые хатуу баримталжа байгаашье хаатнай, би эдэниие таанадта дахин дахин хануулжа байхаб. ¹³Амиды ябаха хаһадаа эдэ бүгэдые таанадта ходо хануулжа байхань зүб гэжэ бодоноб. ¹⁴Ушарынь юуб гэбэл, мүнхынгөө гэртэ мордохо сагни ойртоо гэжэ би мэдэнэб, манай Дээдын Эзэн Иисус Христосыи тиигэжэ намда хэлээ. ¹⁵Үхэхэншые хойномни хэдыдэшые эдэ бүгэдые ханажа байхынтнай тула би бүхы хүсэ шадалаа үгэхэб.

¹⁶Манай Дээдын Эзэн Иисус Христосой заларан ерэхэ тухай хэлэхэдээ бидэ хэн нэгэнэй зохёһон үльгэрнүүдые дабтаагүйбди. Бидэ өөһэдөө тэрэнэй һүр жабхалангые үзэһэн гэршэнэр байгаабди. ¹⁷«Энэ минии дуратай Хүбүүн, би тэрэниие хайшаанаб» гэжэ Бурханай Агууехэ Алдарай дуугай һонортонь хүрэхэтэйнэ зэргэ Бурхан Эсэгэһээ нэрэ түрэдэ, алдар солодо хүртэхэдэнь бидэ байгаа хэмди. ¹⁸Тэрээнтэй хамта нангин хада дээрэ байхадаа, тэнгэриһээ бууһан энэ Бурханай дууе бидэ өөһэдөө дуулаа хэмди. ¹⁹Тиимэхээ таанад лүндэншэдэй айладхаһан юумэнүүдтэ бүришые ехээр этигэжэ байгты. Үдэр мандаад, үглөөнэй толон зүрхэ сэдхэлдэтнай бадарха үе саг болотор харанхы газарта аһажа байһан зуладал адли лүндэншэдэй үгэнүүдтэ анхаралаа хандуулбал, таанад зүб юумэ хэхэт. ²⁰Нангин Бэшэгтэ хэлэгдэһэн лүндэншэдэй үгэнүүдые хүн өөрөө тайлбарилжа шадахагүй гэжэ таанад нэн түрүүн ханажа байгты. ²¹Юундэб гэхэдэ, нэгэшые лүндэншэ өөрынгөө дура хүсэлөөр уридшалан хэлээгүй, харин Нангин Һүлдөөр хүтэлүүлэгдэн Бурханай үгэ айладхадаг байгаа.

Хуурмаг хургагшанар тухай

2 ¹Урдань израильшуудай дунда хуурмаг лүндэншэдэй бии болодогтол адляар таанадай дунда хуурмаг хургагшад байха. Тэдэнэр зүб замһаа хадууруулдаг хуурмаг хургаалнуудые нюусаар асарха, тэдэниие эрхэ сүлөөтэй болгоһон Дээдын Эзэнһээ арсаха, тиигэжэ тэдэнэр өөһэдтөө түргэн хосорол олохо. ²Олон хүнүүд тэдэнэрэй бузар хэрэгүүдые нажааха, тиигэжэ Үнэн бодото зам муушалха

шалтаг тэдэнэр бусад зондо үгэхэ. ³Тэдэ хомхой хуурмаг хургагшад, зохёонхон үльгэрнүүдээ таанадта хөөрөөд, нилээн олзо өөһэдтөө олохо. Гэхэтэй сасуу хэнэн хэрэгүүдэйнь түлөө хэһээлтэ үни гэхээр бэлэн хүлээжэ байна, тэдэнэй үхэлынь удахагүй.

⁴Бурханай Эльгээмэлнүүдэйшые нүгэл хэхэдэ Бурхан тэдэниие хайрлаагүй юм, Зарга сүүдэй Үдэрэй ерэтэр тэдэниие тамада мүнхын харанхыда хүлээд барижа байгаа. ⁵Бурхан урдын хүнүүдыешье хайрлаагүй, муу муухай ябадал гаргагшадые уһан галабаар хүйдхөө юм. Тиэхэдэ Бурханда үнэн зүбөөр хандаха тухай хургадаг Нойе, тэрээнтэй хамта үшөө долоон хүнэй амиие үлээгөө юм. ⁶Муу муухай ябадал гаргадаг зониие хэргылэн, Бурхан Содом ба Гоморро хотынхидые гэмнээд, үнэхэ болгон усадхаа. ⁷Зүгөөр тэрэ зальхай забхай хүнүүдэй дунда арай шамай тэсэжэ байһан үнэн сэдхэлтэй Лотые абараа. ⁸Тэрэ үнэн сэдхэлтэн тэдэ зоноор ажамидархадаа, нүгэлтэ үйлэ хэрэгүүдыень харахадаа, дуулахадаа, үдэр бүхэн аргагүй ехээр тулижа байгаа бэлэй. ⁹Үнэн сэдхэлтэй зониие туршалгануудһаа яажа аршалхые, муу муухай ябадал гаргагшадые Зарга шүүбэрийн Үдэрэй хэһээлтэ хүрэтэр яажа хахижа байхые Дээдын Эзэн мэдэхэ юм гэжэ урда хэлэгдэһэн харуулна. ¹⁰Илангаяа энэнь махабад бэеынгээ муу муухай хүсэлэнгүүдэй мэдэлдэ байдаг, Бурханай эрхэ засагые тоодоггүй хүнүүдтэ хабаатай юм.

Тэдэ убайгүй, хэшхэлгүй хуурмаг хургагшанар огторгойншые хүсэнүүдые доромжолхоёо айдаггүй. ¹¹Эдэ хуурмаг хургагшадта ороходоо нилээн хүсэтэй, хүр жабхалантай Бурханай Эльгээмэлнүүдшые тэдэ огторгойн хүсэнүүдые доромжолдоггүй, Дээдын Эзэнэй урда тэдэниие зэмэлдэггүй. ¹²Харин эдэ хүнүүд гансал зүнгөөрөө мэдэдэг, баригдажа алуулхын тула түрэдэг зэрлиг амитадтал адли юм: ухаанаараа ойлгохо аргагүй юумэнүүдээ хардадаг юм, тиимэхээ тэдэ зэрлиг амитадтал адли үхэхэ. ¹³Тэдэнэр хүнүүдтэ хүргэһэн гэмээ эдлэнэ. Тэдэнэр үдэр дунда найрлаха, архидаха, һамгадаар орёолдохонь зохистой гэжэ тоолодог. Тиимэхээ таанадтай хамта хоол барихадаа тэдэнэр өөһэдынгөө худал хуурмаг ябадалаар сэдхэл ханажа, танай нэрэ түрые унагаадаг, бузарладаг юм. ¹⁴Тэдэнэй нюдэдын ташаяан хүсэлэнгөөр дүүрэнхэй, тэдэ нүгэл хэжэ бээ ханахагүй. Тэдэнэр тулгагүй ахир хүнүүдыел зангадаа оруулдаг. Тэдэнэй сэдхэлынь хомхолзожо хуршанхай. Тэдэнэр үхэхэл табилантай юм. ¹⁵Тэдэ сэхэ замһаа хадуураад, төөришэбэ; буруу юумэ хэжэ, мүнгэ абаха дуратай байһан Веорой Валаам хүбүүнэй замаар

ябаба. ¹⁶ Гэбэшье Валаамай нүгэлын элирүүлэн шүүмжэлэгдээ: хэлгүй элжэгэнь хүндэл адли дуугаржа, лүндэншын тэнэг юумэ хэхэ гэжэ байхадань зогсоогоо юм.

¹⁷ Тэдэ хүнүүд хатаһан булагуудта, шуурганда туугдаһан үүлэнүүдтэл адли дэмы юм: Бурхан тэдэндэ хаб харанхыда газар бэлдээд байна. ¹⁸ Бардам хоохон үгэнүүдые хэлэн, тэдэнэр буруу замда оронзон хүнүүдһээ арай шамай холодоһон хүнүүдые бэын хурисалай, зальхайралай зангада оруулдаг. ¹⁹ Өөһэдөө үхэлэй барлагууд байһан мүртөө мэхэдээ оруулһан хүнүүдтэ эрхэ сүлөө амалдаг. Бидэниие ямар юумэн иланаб, бидэ тэрэ юумэнэй барлагууд болонбди. ²⁰ Манай Дээдын Эзэн, Абарагша Иисус Христосые мэдэрээд, энэ дэлхэйн бузарнуудһаа мултаржа шадаһан аад, һүүлдэнь дахин тэдэ хүсэнүүдтэ баригдажа илагдаһан хүнүүд һүүлэй һүүлдэ түрүүшынхиһээ бүри муу нүхэсэлдэ ороно гээшэ. ²¹ Үнэн сэдхэлтэнэй замые мэдээд, өөһэдтэнь даалгагдаһан Бурханай нангин захяа заабариие сахихаяа болинхаар, тэдэ хүнүүдэй тэрэ замые юрэдөө мэдэнгүй байһань холо дээрэ байгаа. ²² «Нохой бөөлжэһэндөө бусажа ошодог», «Угаагдаһан гахай һөөргөө шабар шабхайда хэбтэхээ ошодог» гэһэн үнэн зүб оньһон үгэнүүдтэ тэдэ хүнүүдэй тушаа хэлэгдэнэ гээшэ.

Дээдын Эзэнэй хоёрдохийо заларан ерэхэ тухай

3 ¹ Хайрата аха дүүнэрни, таанадта хоёрдохийо бэшэнэб. Түрүүн бэшэһэн юумэнүүдээ хануулан, зосоотнай арюун һанал бодолнуудые түрүүлхэ гэжэ оролдобоб. ² Гэгээн лүндэншэдэй хэлэһэн үгэнүүдые, элшэнэрэйтнай таанадта дамжуулһан Дээдын Эзэнэй ба Абарагшын захяа заабариие хануулха хүсэлтэй байгаа. ³ Нэн түрүүн таанад һүүлшын үдэрнүүдтэ хүсэлэнгүүдэйнгээ мэдэлдэ байдаг хүнүүд ерэхэ гэжэ мэдэжэ байха ёһотойт. Тэдэнэр таанадые наада барин, ⁴ «Ерэхэб гэжэ үгөө таанадта үгөө бэшэ һэн гү? Тиигээд хаанаб тэрэтнай? Үбгэ эсэгэнэрнайшые наһа бараа, теэд бүхы юумэн юртэмсэ дэлхэйн бүтээгдэһэнһээ хойшо тэрэл хэбээрээ байна бэшэ аал?» – гэжэ хэлэхэ. ⁵⁻⁶ Эртэ урда сагта Бурханай өөрынгөө үгөөр огторгой бүтээһэниие, уһые хумяад ба уһа тойруулаад хуурай газар бии болгоһониие, тэрэ уһанһаа боложо тэрэ үеын газар дэлхэй уһан галабта абтаад хүнөөгдэһэниие тэдэнэр зорюута анхарангүй байна. ⁷ Харин мүнөө оршожо байһан огторгой дэлхэй хоёр галда хүнөөлгэхын тула тэрэл Бурханай үгөөр хадагалагдажа байгаа юм. Тэдэнэр Бурханиие буруушаһан хүнүүдэй шүүбэрилүүлжэ хосорхо Зарга

шүүбэрийн үдэрэй ерэтэр хадагалагдажа байха. ⁸ Хайрата аха дүүнэрни, Дээдын Эзэндэ нэгэ үдэр мянган жэлнүүдтэ адли, тиин мянган жэлнүүд нэгэ үдэртэл адли юм. Энээниие бү мартаарайгты. ⁹ Дээдын Эзэн найдуулхан юумээ бэлүүлхээ яаранагүй гэжэ зарим хүнүүд ханадаг. Үнэндөө болбол тэрэ маанадай нэгэшье хүнэй хосоронгүй, нүгэлөө мэдэрэн гэмшэхыемнай тэсэбэритэйгээр хүлэжэ байгаа юм.

¹⁰ Гэхэтэй сасуу Дээдын Эзэнэй Үдэр хулгайшандал адли ханамсаргүй байхада ерэхэ. Тэрэ Үдэр огторгой шангаар дуугаран үгы болохо, огторгойдо байхан нара, нара, одо мүшэд шатажа хүнэхэ, газар дэлхэй болон дээрэнх оршоһон бүхы юумэнүүд галда шатан усадхагдаха. ¹¹ Эдэ бүхы юумэнүүдэй иимэ аргаар хүнэжэ байхада таанад ямархан хүнүүд байха ёһотойбта? Таанад гэгээн амидаралтай, өөһэдыгөө Бурханда зорюулхан байха ёһотойт, ¹² огторгойн шатажа хүнэхэ, огторгойдо байхан нара, нара, одо мүшэдэй галда хайлаха Бурханай тэрэ Үдэрые хүлэжэ, тэрэ үдэрые ойртуулхын тула бүхы шадалаараа оролдохо ёһотойт. ¹³ Тиихэдэ бидэ Бурханай найдуулхан ёһоор ажамидарха шэнэ огторгой ба шэнэ газар дэлхэй хүлэжэ байнабди.

¹⁴ Тиимэһээ, хайрата аха дүүнэрни, тэрэ Үдэрые хүлэжэ байхадаа, Бурханай урда ямаршье бузаргүй, арюун сэбэр байхые, Бурхантай энхэ тайбан оршожо байхые оролдыт даа. ¹⁵ Бидэндэ абарагдаха боломжо үгэн, манай Дээдын Эзэн аргагүй удаан тэсэжэ байна гэжэ бодогты. Тон тиигэжэл хайрата Павел аха Бурханай хайрлаһан ухаанай хүсөөр таанадта бэшээ бэлэй. ¹⁶ Павел хандалга бүхэндөө энээн тухай хэлэнэ. Тэрэнэй хандалганууд соо ойлгоходо хүшэр юумэнүүд баһа бии, тэрэниенх үндэхэ хууригүй, харанхы мунхаг хүнүүд Нангин Бэшэгэй ондоошье номуудтал адли буруугаар, хазагайруулан тайлбарилдаг юм. Тиигэжэ тэдэ зон өөһэдтөө үхэл бэдэрнэ гээшэ.

¹⁷ Хайрата аха дүүнэрни, таанад энээн тухай мэдэн болгоомжотой байгты, эдэ Бурханиие буруушаһан хүнүүдтэл адли үндэхэ хууригүй зон бү бологты. ¹⁸ Зүгөөр, манай Дээдын Эзэн ба Абарагша Иисус Христосые саашадаашы мэдэржэ, үршөөл хайрадань хүртэжэ байгты. Тэрэ мүнөөшье, хэтын хэтэдэшье алдар солотой байһай! Болтогой!